

Baez Bengcag Doxdax Nanzlumz Ndeu

令人难忘的拔河比赛



Ngoenzneix lajbyonghngoenz, lauxsae naeuz dou nyi: “Dangz goq daihngaih, ban raeuz gawjhengz bengcag doxdax. Aen siusik sawqmwh gietdingh neix sawj dou gig angq.

Dangz daihgeih youq dou deqmuengh haenx daeujdaengz lo.

Lauxsae daiq dou daengz cauhaengz bae. Dou baen baenz song aen

doih. Vihliux goengbingz, moix doih saimbwk vunzsoq doxdoengz. Lauxsae guh caizbuenq, moix doih miz geij boux hagseng mbwk guh lahlahdui. Cauhcangz cungqgyang cuengq miz diuz cag youh raez youh co he, cungqgyang diuzcag gug miz diuz baengznding he.

Lauxsae youq doxdax gaxgonq gaisau doxdax gvicaek: “Moix aen doih baihnaj miz diuz sienq hau ndeu, baengznding diuzcag cungqgyang haenx hamjgvaq sienqhau doih lawz, doih haenx couh ndaej hingz.”

Gaisau sat gvicaek doxdax, dou couh gak doih ndwn youq mbiengj doih swheij, bwh yaek bengcag.

Gyoengq doengzhag bwh ndei le, caizbuenq daihsing hemq: “Yibei!” Song mbiengj cungj gaem ndaet diuzcag.

“Fit——” Singsauq yiengj le, song doih vunz cungj gig yunghrengz rag, siengj rag baengznding daengz mbiengj swheij.

Mwngz yawj, boux doengzhag neix, gwnz naj lae baenz naed baenz naed hanh. Lahlahdui gak vih doih swheij hemq gayouz gayouz.

Mbouj yaep ndeu, baengznding daengz daengz doih wnq bae lo. Ai, doih dou saw lo!

Dou mbouj fug, dou iugouz caiq doxdax baez he. Lauxsae cinj le, dou

doxvuenh ciengzdieg. Baez gonq saw dwg aenvih dou mbouj doxgiet, ndigah dou gietdingh youz boux sing hung vih dou hemq gyayouz. Ginggvaq dou caez haenqrengz rag, doih dou ndaej hingz lo. Doiqfueng cijndei dangheiq, nyinhsaw lo.

Daihgya caez ok rengz, bya sang hix senj ndaej. Doih dou ndaej hingz, dwg aenvih dou doxgiet. Cijaeu doxgiet gijmaz saeh cungj guh ndaej baenz.

Baez bengcag doxdax neix hawj gou gig nanzlumz. Gou deqmuengh baezlaeng dou caiq daeuj daxdax bengcag.

(sam nienzgaep Siujyen)



Ngoenz Vaiqvued Ndeu

快乐的一天

贵港市覃塘区蒙公乡高占小学四(2)班 陆一泓

Seizcou ngoenz singhgiz roek ndeu, gou bae ranz daxdaiq guhcaemz. Ngamq byaij haeuj gyanghongh, gou couh nyouq daengz raq heiqhom he, gou yawj seiqhenz, o, vagut henz ciengz hai lo. Gou sim'angq raixcaix, seizneix, gwnz ndoi itdingh miz haujlai vagut hai lo, hix miz haujlai makndoi gug lo.

Gou doiq biujcej gangj gou siengj bae gwnz ndoi guhcaemz, biujcej raen gou yienghneix angq, couh doengzeiq daiq gou bae gwnz ndoi laeng mbanj guhcaemz. Daxdaiq naeuz: “Seizneix gwnz ndoi miz duzngwz okdaeuj youz,

sou aeu siujsim bw!” Dou angq dwk han naeuz: “Dou rox lo, mwngz cuengqsim ba!” Biujcej saeqsing doiq gou naeuz: “Seizneix gwnz ndoi miz cungj makndoi ndeu, lumj naedduh hung, hoengzww, baenz roix baenz roix, geijlai ndei gwn ha! Raeuz bae mbaet ma gwn ba!”

Dou benz daengz gyangndoi, gwnz ndoi hai miz haujlai vagut ndoi, mbawraeu hix bienq hoengz lo, cuengq da yawj bae, gwnz ndoi ndei yawj dangqmaz! Gou cingq yawj dwk, biujcej coi naeuz: “Lij gyaengj gijmaz, vaiq di gvaqdaeuj, gizneix miz haujlai makndoi, vaiq daeuj mbaet lo.” Gou dingq le,

gipmuengz buet gvaqbae. Dahraix, ndaw geh go'em miz baenz caz baenz caz makndoi, giet baenz roix baenz roix, geijlai dwggayez ha! Gou sikhaek mbaet roix ndeu daeuj gwn, caen diemz ha! Mbouj geij nanz, dou couh mbaet ndaej daehgau rim lo. Gou ngiengx gyauej uet hanh, fatyienh daengngoenz gaeng roengz bya lo. Gou lij siengj hwnj dingjbya bae youz, biujcej heuh ma ranz lo, gou cijndei sij mbouj ndaej byaij dauqma lo.

Ngoenzneix gou caen simangq ha!

(指导老师:覃珍团)



Daxmeh Buenx Gou Majhung

母亲伴我成长

贵港市覃塘区蒙公乡高占小学二(2)班 黄茂晨

Daxmeh gou maj ndaej hamq sang, byoem youh ndaem youh raez, mbiengj naj baihgvaiz miz aen cenjlauj ndeu, baez riu gig ndei yawj. Singriu daxmeh ndei dingq raixcaix, baez riu couh lumj sing lingzngaenz ityiengh.

Daxmeh gig gyaiez gou, baez ndaejhoengq daxmeh couh gangj goj hawj gou dingq. Daxmeh moix gangj sat aen goj ndeu, couh cam gou daj ndaw goj rox daengz gijmaz. Gij goj daxmeh gangj haenx hawj gou rox ndaej haujlai cihsiz caeug dauhleix.

Bineix yenzdan, daxmeh daiq gou bae gunghyenz ndaw singz guhcaemz. Yienznaeuz daxmeh naengh banci deng ngunhci, hoeng, daxmeh itdingh aeu buenx gou bae youz gunghyenz. Youq ndaw gunghyenz, daxmeh buenx gou cuengq yiuhrumz. Dou youq diegnywj buet ha buet, daxmeh hix lumj gou ityiengh angqvauvau dwk youh buet youh hemq. Gou bang daxmeh ra seiziq dauqma lo.

Daxmeh gou hawj gou seiziq gvaq ndaej gig angqyangz, gou gyaiez daxmeh, docih de itcig buenx gou majhung.

(指导老师:韦春柳)



Gou dwg aen doengjnyapnyaj cuengq youq gox bakdou hagdangz mbouj yienhda he, couhcinj nyapnyaj baenzlawz uq gou cungj mbouj yiemz, hoeng gou couhdwg nyaenx mbouj ndaej mbanj doengzhag doiq gou mbouj aeueiq.

Mbwn caengz rongh, daxheiz baetdieg haenx couh daeujdaengz henz ndang gou, baet gou uet gou ndaej seuqsaksak. Gou sim'angq ndwn youq gox bakdou hagdangz, muengh miz gou le ndaej sawj gizneix bienqndaej seuqcengh

cingjcaez. Gyoengq doengzhag daeuj hagdangz lo, gou hix wnggai guhhong lo. Gou aj hung aenbak gou, muengh gyoengq doengzhag dawz nyapnyaj soengq daengz ndaw bak gou. Hoeng, baezneix youh sawj gou saetmuengh lo. Miz mbanj doengzhag lumj yawj mbouj raen gou nei, cungj vut nyapnyaj youq giz liz gou mbouj gyaie haenx, hawj seiqhenz gou yawj bae cungj uqatat. Sawqmwh, aen bingzyinjliu he gveng gvaqdaeuj bungq deng aen' gyauej gou, sawj gou gyauej-

ngunh dava. Lij caengz caj gou singj gvaqdaeuj, boux hagseng sai sangsang hunghung he byaij gvaqdaeuj, dawz mbaw sigenj gauj mbouj gizgwz haenx nu baenz nyeuq he, yunghrengz gveng deng aendungx gou, lij yungh din dik gou dem.

Gou caen siengsim ha. Gyoengq doengzhag, cingj sou baezlaeng gingqcungh gij hong gou di ndeu, ndei lwi?

(seiq nienzgaep Liuj Swj-hanz)

